

gustav / February 02, 2013 12:01AM

[《呂帝心經》](#)

《呂帝心經》

呂帝曰。

天生萬物。惟人最靈。匪人能靈。實是心靈。
心為主宰。一身之君。役使百骸。區處群情。

物無其物。形無其形。稟受於天。良知良能。
氣拘欲蔽。日失其真。此心既失。此身亦傾。
欲善其身。先治其心。治心如何。即心治心。

以老老心。治不孝心。以長長心。治不弟心。
以委致心。治不忠心。以誠格心。治不信心。
以恭敬心。治無禮心。以循理心。治無義心。
以清介心。治無廉心。以自愛心。治無恥心。
以積德心。治為惡心。以利濟心。治殘賊心。
以匡扶心。治傾陷心。以仁慈心。治暴戾心。
以謙遜心。治傲慢心。以損抑心。治盈滿心。
以儉約心。治驕奢心。以勤慎心。治怠忽心。
以坦夷心。治危險心。以忠厚心。治刻薄心。
以和平心。治忿恚心。以寬洪心。治褊窄心。
以傷身心。治沉湎心。以妻女心。治姦淫心。
以果報心。治謀奪心。以禍患心。治鬪狠心。
以正教心。治異端心。以至誠心。治大疑心。
以悠久心。治無恒心。以始終心。治反覆心。
以施與心。治慳吝心。以自然心。治勉強心。
以安分心。治非望心。以順受心。治怨尤心。
以推誠心。治猜忌心。以鎮定心。治搖惑心。
以正中心。治偏袒心。以大體心。治細務心。

嗟乎人心。不治不純。如彼亂絲。不理不清。
如彼古鏡。不磨不明。如彼劣馬。不勒不馴。
帝故說經。欲治人心。人心得治。天地清寧。

偈曰。

一切惟心心最危。範天圍地發光輝。

天心即在人心見。人合天心天弗違。

《呂帝心經》終

Edited 1 time(s). Last edit at 02/02/2013 12:01AM by gustav.
